

ბაღდათის მუნიციპალიტეტის საკრებულოს

დადგენილება №84
2012 წლის 26 ოქტომბერი

ქ. ბაღდათი

ბაღდათის მუნიციპალიტეტის სიმბოლოების (გერბი, დროშა) ესკიზის დამტკიცების შესახებ

„ადგილობრივი თვითმმართველობის შესახებ“ საქართველოს ორგანული კანონის მე-8 მუხლის 43-ე მუხლის მეორე პუნქტისა და ბაღდათის მუნიციპალიტეტის სიმბოლოების ესკიზების შესარჩევი კონკურსის განმხორციელებელი დროებითი კომისიის 2012 წლის 20 ივლისის №7 ოქმის შესაბამისად, **ბაღდათის მუნიციპალიტეტის საკრებულომ დაადგინა:**

მუხლი 1

დამტკიცდეს ბაღდათის მუნიციპალიტეტის სიმბოლოების (გერბი, დროშა) ესკიზი (კონკურსში წარმოდგენილი კოდით 17024003 -ავტორი დავით გრიგოლია).
დანართი №1, დანართი №2, დანართი №3.

მუხლი 2

დაევალოს მუნიციპალიტეტის გამგეობას:

1. უზრუნველყოს კონკურსში გამარჯვებული პიროვნების დავით გრიგოლიასათვის ბიუჯეტით გათვალისწინებული საპრიზო თანხის ანაზღაურება.
2. წარმოადგინოს წინადადებები ბაღდათის მუნიციპალიტეტის გერბისა და დროშის დამზადებასთან დაკავშირებით დამტკიცებული ესკიზის შესაბამისად.

მუხლი 3

დადგენილება ამოქმედდეს გამოქვეყნებისთანავე.

საკრებულოს თავმჯდომარე


გიორგი რობაქიძე

დანართი №1

ბაღდათის მუნიციპალიტეტის გერბი



ბაღდათის მუნიციპალიტეტის დროშა



ბაღდათის მუნიციპალიტეტის გერბისა და დროშის სიმბოლოების აღწერილობა

ბაღდათის მუნიციპალიტეტის გერბი - გერბის ფარი შუაზეა გადაკვეთილი, ხოლო ზედა ნაწილი გადაკვეთილია და იყოფა ორ ველად. პირველი ნაწილი-ზურმუხტოვან ველზე ოქროს ირმის თავი მასზე აღმართული ოქროს ჯვრით. მეორე ნაწილი - ლაჟვარდის ველზე ვერცხლის წყარო. მესამე ნაწილი - მეწამულ ველზე ქვედა ნაწილში ოქროს ორკოშკიანი ციხე-სიმაგრის გამოსახულება კვეთს ველის კიდეებს. ციხე-სიმაგრის თავზე ზედა ნაწილში გამოსახულია სამი ჰერალდიკური ოქროს ვარდი ორი ერთზე.

გერბის ფარს ზემოთ მოთავსებულია საქალაქო ვერცხლის გვირგვინი -სამკოშკიანი ქონგურებიანი გალავანი (ციხე-სიმაგრის ფორმის) ნახევრადღია კატარაქტიანი კარიბჭით.

ფარს ქვემოთ მოთავსებულია გერბის დევიზის ვერცხლ-ზურმუხტოვანი ბაფთა, რომლის ვერცხლის ველზე შავად ჩაწერილია დევიზი „ბაღდათი“.

ბაღდათის მუნიციპალიტეტის დროშა - დროშის ქსოვილი გაყოფილია ვერტიკალურად ორ თანაბარ ნაწილად: პირველ ნაწილში მეწამულ ველზე გამოსახულია სამი ჰერალდიკური ოქროს ვარდი ორი ერთზე; მეორე ნაწილი გაყოფილია ჰორიზონტალურად ორ თანაბარ ნაწილად. ზედა ნაწილზე არის ზურმუხტოვანი ველი, ქვედა ნაწილი არის ლაჟვარდოვანი ველი.

დროშის პროპორცია: 2:3.

